



19. oktober 2020

UKA 2020/82

Naqqiut

Tungavilersuummi oqaatsinik tulluusaaneq

Allangortinneqarpoq 19. oktober 2020

Inatsisartut Suleriaasianni § 33 naapertorlugu aalajangiiffigisassatut siunnersuut imaattoq matumuuna saqqummiuppara:

Sullualuup siunissami aqqusaalutarineqariartuaarnissaa sillimaffigalugu, sapinngisamillu annertunerpaamik periarfissaasinnaasunik atorluanaanissaq siunertaralugu nunatsinni international frihavnimik sanaartortoqarlunilu pilersitsisoqassappat suut pitsaaqutaallutillu ajoqutaasinnaanersut Naalakkersuisut nassuiaasiornissaat pillugu Inatsisartut aalajangiiffissaattut siunnersuut. Nassuiaat UKA 2021-mut naammassineqassaaq.

(Atassut Inatsisartutgruppe)

Tungavilersuut.

Ilisimareerparput takkukkumaartooq. Taamaattorlu ineriartulerneq ilisimaarereerlugu sioqqullugulu unamminartut periarfissallu naapitassagut ilisimaaralugit piareersimaffigissavagut. Sullualuk piareersarfigisassatut periarfissatsialaavoq, tamannalu sapinngisamik siusinnerpaamik pisariaqarluni.

Nunanut tamalaat akornanni talittarfimmik killilersorneqanngitsumik sinerissami umiarsualiveqartilluta nunarsuarmi niuernermut peqataalersinnaavugut, taamaasillutalu aningaasatigut iluanaarutissat atorluarlutigit. Maannamut nunat tamalaat akornanni umiarsualiveqarnikkut aaqquissuussinissaq sutigut niuernikkut aningaasarsiornikkullu uatsinnut qanoq iluaqutaatigisinnaanera suli ilisimannilarput. Taamaattumillu suliniutip taamaattup iluaqutissartai ajoqutigisinnaasaalu naalakkersuisunit misissorneqarnissaat sukumiisumillu nassuiaaffigineqarnissaat siunnersuutigaarput.

Suliniummik taamaattumik aallartitsiniarneq akisoqaaq, taamaattumillu aamma nunat tamalaat akornanni kikkut suleqatissatut periarfissaaneri misissussallugu pingaaruteqarluni, kiisalu aamma suliniutip avataaniit soqutiginaateqartinneqarnera qanoq annertutigissanersooq misissuataarluagassaalluni.

Aallartisarnermut eqqarsaatersornerup nalaani umiarsualiviup sumi inissisimanissaa ammaffigineqarpoq. Aningaasarsiornikkut iluanaarutissat annertunerpaartaaniitsinniarninerini aningaasatigut niuernikkullu periarfissaasut pitsaanerpaat salliutissallugit pisariaqarput, imaanngitsoq



politikkikkut isummersuutit tunngavigalugit sinerissami sumi ineriartortinneqassanera kalluussaassutaatillugu.

Taamattaq pingaaruteqarpoq nunat tamalaat akornanni aningaasartuuteqanngitsumik umiarsualiveqarneq inatsisitigut ”nuna alla”-tut assigiinngitsutigut taakkartorneqartarmat. Taamattaq aamma ippoq ilanngaaserinikkut inatsisit naapertorlugit. Tassa imaappoq, toqqaannartumik akitsuuserinikkut isertitaqarnaviannngitsugut. Taamaakkaluartoq assigiinngitsutigut immikkut akitsuusiinermi maleruagassaqarpoq atorluarsinnaasatsinnik, kiisalu aamma niuernikkut periarfissanik umiarsualivik assigiinngitsutigut ammaasseqataassaaq, allaallumi aamma immaqqa nunanit allanit akikinnerusunik nioqutissanik pissarsisinnaassalluta, tassuunakkullu aamma nammineq tunisassiarisatsinnik avammut assartuussineq ineriartortissinnaassallutigu.

Soorunalumi aamma sillimaniarnikkut assigiinngitsutigut malittarisassaataasut ileqqullugu naapertorlugit aqqissuineq avaqqunneqarsinnaanngilaq, taakkualumi aamma saniatigut avatangiisinut innarlitsaaliuinerimi maleruagusaasut sakkortuut najoqqutarissallutigit, taannaammat pingaarutilik immikkut eqqumaffigisassarput.

Aningaasatigut ingerlatsinikkullu pisortanut kingunerisassai:

Nassuiaasiornissap ukiup ataatsip ingerlanerani suliarineqarsinnaanera naatsorsuutigineqarpoq. AC Fuldmægtigellu ukiumut sulineranut 500.000 kr.-mut naleqassalluni.

Namminersortunut aningaasarsiorinikkut allaffissornikkullu kingunerisassai:

Soqanngilaq.

Innuttaasunut aningaasarsiorinikkut allaffissornikkullu kingunerisassai:

Soqanngilaq.